

# Cara Menambah Pendapatan Keluarga

Sumber: <http://wuina.blogspot.com/2011/01/cara-menambah-pendapatan-keluarga.html>

Pada masa ini pasangan suami isteri perlu bertolak ansur, bukan hanya perasaan pasangan yang perlu dijaga malah sumber kewangan juga perlu mempunyai budget yang tersendiri. Anda dan pasangan pasti tidak mahu dilanda krisis kewangan yang kritikal. Lakukan perbelanjaan yang sesuai dengan jumlah kewangan yang diperolehi. Namun sesiapa pun pasti tidak dapat menduga perkara-perkara kecemasan yang akan berlaku. Pada masa tersebut sumber kewangan adalah diperlukan untuk mengurangkan penderitaan itu. Jika perkara ini berlaku, bukan bererti kita perlu bersifat tamak tetapi sumber kewangan adalah sebagai alat untuk mengurangkan beban yang dihadapi. Luangkan masa untuk berkongsi idea dengan suami atau isteri bagi mengawal perbelanjaan bulanan. Selain berjimat cermat, terdapat juga langkah-langkah lain yang dapat mengurangkan dan menambah pendapatan isi rumah. Mengapa perlu mengikat perut sedangkan terdapat cara lain yang dapat membantu? Berikut adalah beberapa perkara yang dapat memberi idea untuk mengawal perbelanjaan bulanan. Semoga langkah-langkah ini dapat memberi panduan kepada pasangan suami isteri.

## 1. PELABURAN JANGKA PANJANG

Masa kini terdapat pelbagai kemudahan yang ditawarkan oleh pihak perbankan kepada pengguna. Antaranya ialah simpanan tetap, akaun semasa, akaun simpanan, mahupun pelaburan jangka panjang. Faedah yang ditawarkan juga amat memuaskan. Jika ragu-ragu dengan perkhidmatan yang ditawarkan, pilihlah perkhidmatan yang menawarkan urusan secara Islam. Dapatkan segala maklumat yang anda perlukan dari pihak mereka. Pelaburan ini sudah tentu dapat digunakan pada masa anak mahu melanjutkan pelajaran atau saat kecemasan yang memerlukan perbelanjaan yang banyak. Pada ketika itulah anda dapat menghela nafas lega. Ini adalah seperti tidak menambah masalah baru kepada perkara tersebut.

## 2. BERNIAGA SECARA KECIL-KECILAN

Adakah anda bekerja? Lakukan satu perkara yang dapat menambah pendapatan anda walaupun semasa anda sedang bekerja. Gunakan pengetahuan dan kemahiran anda. Jika anda mempunyai kemahiran seperti memasak, adalah baik jika anda boleh berniaga secara kecil-kecilan di pejabat seperti menjual sarapan pagi yang siap sudah dibungkus. Letakkan di satu sudut seperti ruang makan yang sering menjadi tumpuan pekerja. Namun anda juga perlu pastikan bahawa perniagaan anda tidak mengganggu tugas-tugas seharian di pejabat.

## 3. MENAMBAH PENDAPATAN SEMASA DI RUMAH

Bagi sebilangan pekerja, mereka berpendapat jika mahu mempunyai pendapatan yang lebih, perlu melakukan kerja lebih masa. Namun ini pasti akan menjadi masalah kepada pasangan suami isteri jika anak dijaga oleh pusat asuhan. Ibu bapa perlu mengambil anak-anak pada masa yang telah ditetapkan oleh pusat jagaan tersebut. Cara mudah untuk menambah pendapatan semasa di rumah ialah melakukan kerja-kerja tambahan dari rumah yang tidak memerlukan anda melakukan atau pergi ke tempat lain. Antara kerja-kerja yang dapat anda lakukan ialah seperti membuat tuisyen kepada kanak-kanak atau kerja-kerja manual yang sering pihak perkilangan berikan kepada individu luar bagi memudahkan kerja-kerja mereka. Malah pada masa kini jika anda yakin, sudah tentu anda boleh memulakan pekerjaan dari rumah. Bantuan teknologi seperti komputer dan faks dapat membantu mengurangkan pergerakan anda ke tempat-tempat lain. Melalui perkembangan teknologi semasa juga anda boleh melakukan perniagaan internet hanya dari rumah. Pada masa kini banyak peluang untuk memulakan atau menambah pendapatan dari internet. Cuma terpulang kepada kita untuk menyelidik dan memilih perniagaan internet bagaimana yang sesuai dengan minat dan pengetahuan kita.